

Poloni iye Timoti Pipia Talo Tipe Topa Tirimu Ungumu 2 Timoti I Ungu Torumumunga Ungu Pulu Mare

Ka ulkena pepalie Poloni i pipiamu topa panjirimu. Yu toko kondonge ulu lipe manjipelie Kraistingu imboma molko kondangei konopu lerimu. Timotini Gotenga ungu tukumemu nimbe kondopili nimbe tepe enge tipe ungu mane tipelie Poloni nimu.

Goteni nu kongono tirimumu kamukumu teko pora tikolio konopu ame toli molani nipili!

Poloni Timotindo enge pepili molopa, Gotenga kongonomu tendembai tiye naa kolopa ungu tukumemu pipili naa kolopa molopili nimu ungumu

¹ Na Pol, Goteni na kanopa ltimuna Kraist Jisasini nanga kongonomu tendepuwi nimbe lipe mundurumu iyemu moro. Kraist Jisasi kinye peya kopu teko moromele imboma koinjo molko kondoko kau punge ungumu andopa imboma nimbo tiembo nimbe Goteni na kanopa ltimu.

² Timoti nu nanga malo konopu mondoromu i pipiamu topo tiro.

Lapa Gote kinye linonga Awilimu Kraist Jisasi taloni nu we kondo kolko teko kondoko, nuni ulu mare teko kenjinio kinye nu kondo kolko mindili nani naa ningi, nu konopu ame topili taka liko molani nengili.

Ungu tukume nimelemunga pipili naa kolamili

³ Nanga ara kae kameni Gotenga ungu manema pilko liko teringi mele na aku tepo ulu teroma konopuni pilipolio te tepo kenjiro nimbo naa lipo manjiro. Tero mele Goteni kanopa penga pimo nimbo lipo manjiro. Aku kongono tendepo Gote kinye ipu leli tangoli kape ungu nimbo konge tepo molopo, nuni teko morono ulu pilipo nunge konge tendepolio, Gote kinye paa tereno nio.

⁴ Nu oi kola terinu mele lipo manjipolio nu kanopoliope na tono kolombo konopu lteo.

⁵ Nu morono mele pilipolio, nu Gotenga ungumu paimbo ningi enge ningi ipuki tirino mele altopo pio. Enge ningi pino mele kolo te naa torono nimbo lipo manjiro. Nu enge ningi ipuki tirino mele bamu Lois kinye aminye Yunis talo oi teringili mele. Elo ipuki tiringili mele nu aku teko pino nimbo pio.

⁶ Nu aku teko pilko morono mele pilipolio, nani nu ki ola noiru kinye Goteni nu enge te we tirimu akumu imbomani tipe enge nili awili tepe nopili ningi popo toromele mele nu aku teko Goteni enge tirimumu paa enge tipili ningi aku enge-muni nu waliwalima enge ningi kongono teani nimbo nio.

⁷ Goteni Mini Kake Telimu tipelie lino pipili kololi ulumu naa tirimu. Enge nili ulumu kinye, konopu mondoli ulumu kinye, lino linongano nokopo kondomolo ulumu tirimu.

⁸ Akumunga linonga Awilimunga ungumu imboma ningi tinindo aku tembo kinye na mindili tiko tongenje ningi pipili naa kolowi. Na yunge kongono tenderomunga ka ulkena pero akumu

nu aku teko ka tingenje ningo pipili naa kolowi. Na ungu tukumemu nimbo timbo kinye Pol mindili tirimele mindili noromo mele na aku tepo mindili tinge mindili nondu lemo ulure molo ningon kongono tewi. Altoko paimbo mindili tinge mindili nonio lemo Goteni nu enge tirimomuni nu enge ningon molonio.

⁹ Enge nimbo molamili nimbe enge tirimo Gote akumu lino lipe tapondopa mindili nolemala aulkena wendo lipe yu kinye peya molopo kondomolo aulkena lipe mondopa, lino kanopa lipe Yunge imbo kake telima molangei waio nimu Gote. Lino aku tepa lipe tapondopa kanopa Itimumu linoni linongan ulu te terimulumunga kanopalie aku tepa naa terimu. Yuni yunu lino temolo mele pilipe kanopa lipe lino we kondo kolopalie lino waio nimbe lipe tapondorumu. Paa koro oi yunu molopalie yuni Kraist Jisasini linonga nimbe tendembalomunga lino we kondo kolopo lipo tapondombo nimu,

¹⁰ nalo kinye, linonga Tepa Lipe Mindili Nolemala Aulkena Wendo Lili Iye Kraist Jisasi maina ombo linonga nimbe tenderimumunga Goteni lino we kondo koromo mele mona wendo orumu. Kraist Jisasi kololi ulumu kamukumu topa mainye mundupe, yunge ungu pengamu paimbo ningon enge ningon ipuki tirimele ulumuni altopo naa kolomolo ulumu kinye koinjo molopa kau puli ulu pulumu talo limolo aulkemu wendo ombo mona lerimu.

¹¹ Aku ungu tukumemunga Goteni na Pol kanopa lipelie, i ungu tukumemunga andoko ningon tiko, Kraistini lipe mundurumu iye te

molko, yunge ungumu imboma mane tinio iyemu molani nimu.

¹² Na aku tepo kongono teromunga na mindili tirimelena mindili noro. Nalo na paimbo nimbo enge nimbo pio iyemu tepa moromo mele pilipolio, na ungu tukumemu paimbo nimbo enge nimbo ipuki tiro ulumu kinye, yunge kongono tirimuna teromu kinye, yuni wamba nokombalomunga keri naa lepa we lepa kau pupili mulu mai talo pora nimbelo waimu wendo ombalomunga lipo manjipolio na mai kolopo konopu umbuni pepili naa moro.

¹³ Kraist Jisasini nu tapondombalo kinye nuni yu paimbo ningi ipuki tirino mele enge ningi pilko, Jisasi kinye imboma kinye konopu mondokolio nani unguma nu nimbo tipo, mane tipo, niuna pilerinu mele wamongo pilkolio aku teko kau imboma mane tieni.

¹⁴ Ungu tukumemu Goteni nunge kindo noindirimomu nokoko kondowi. Linonga konopuna Mini Kake Teli moromomuni nu enge timbelomuni aku kongonomu wamongo nokoko kondowi.

¹⁵ Esia provins nu morono kombuna moromele Kraistinga imboma pali na tiye koloringi mele nu pino. Aku imbomanga Figelus kinye Hermogenes taloni na tiye koloringilila.

¹⁶ Iye Onesiforus na ka ulkena Peru kinye pipili naa kolopa, na konopu wango nipili molambo nimbe wali awini tapondorumumunga Awilimuni Yu kinye yunge imboma kinye kondo kolopa lipe tapondopili.

17 Yu kombu awili Rom ombalie na koropa al-topa na moloruna omba kanopa lenderimu.

18 Gotenga kot waimu wendo ombalo kinye Awilimuni yu kondo kolopa tepe kondopili. Na kombu awili Efesus moloru kinye kape yuni na wali awini tapondorumu mele nu pino.

2

Poloni Timotindo nu Kraist Jisasinga opa teli ami iye enge nili molani nimu ungumu

1 Nanga ungulumu, Goteni nu kongono tirimu akumu wamongo nokani nio akumunga, Kraist Jisasinga we kondo kololi ulumuni nu tepe enge tipili.

2 Aku tekolio imbo awini pilko molangei nani ungu nimbo tiruna nu pilerinu kano unguma Kraistinga ungumu nokoko kondoromele iyema, imboma manda mane tiko kondonge iye mare ningtiwi.

3 Kraist Jisasinga opa teli ami iye pengamu moro ningtiwi na mindili noro mele mindili nombomunga ulure molo ningtiwi enge ningtiwi molowi.

4 Iye te opa teli ami iye te molopalie, yu we kongono lupe lupema konopuni naa pilipe, yunge opa teli iye awilimuni yu teremo mele kanopa penga kanopili nimbe aku kongonomu kau enge nimbe pilipe teremo.

5 Aku tepala, imbo te imbo mare kinye peya keri kuru liko aulke lkirimelie imbomu yu lkiembo nimbe keri kuru liko lkieli ungu manema pilipelie lkirimo. Ungu manema naa pilipelie lkimo lemo

yu keri kuru lipa lkirimomunga mele te naa limbelo.

⁶ Aku tepala, imbo teni poinye mindili nomba tepea nokopa kondoromo imbomuni kumbe lepa langi awini pengama paa limbelo.

⁷ Ya nundo nio ungumunga puluma Awilimuni nu lipa ondombalo kani nio mele paa wamongo pilko molowi.

⁸ Jisasi, Goteni kanopa ltimu Iye Nomi Kraist, yu iye nomi king Devitini kalopa ltimu iyemu, kolopalie makilipe ola molorumu ungu tukumemu nimbo tiro, aku iyemu moromo mele konopu kimbo tiko molowi.

⁹ Kano ungu tukumemu nani nimbo tilipo andoromunga imbomani na iye kerimu ninga na umbuni awini tiko ka tirimele mindili noro nalo Gotenga ungumu ka manda naa tirimele.

¹⁰ Akumunga, Goteni nanga imboma molangei nimbe kanopa ltimu imboma kape Kraist Jisasi paimbo ninga ipuki tiko yu peya kopu teko moromelemunga altoko mindili nolemala aulkena wendo lipa yu kinye peya molko kondonge aulkena lipa mondopili nimbo na waliwalima enonga nimbo mindili awini noromu, ulure molo nimbo mindili nombo moro.

¹¹ Unyu te, ipuki tiemili nimbo nimbo tiemboi: Kraist kinye peya kolomolo lemo yu koinjo molombalo mele lino yu kinye peya koinjo molomolo.

¹² Lino mindili nomolo wali enge nimbo molopo tiye naa
kolomolo lemo lino yu kinye peya iye nomi kingima

molopo melema nokomolo.

Linoni imbomando Jisasi yu kanopo imbi naa tir-imolo,

Yunge imboma naa moromolo nimolo lemo

Yuni Lapando imbo ima na kanopo imbi naa tiro,
eno nanga imbomare molo nimbelola.

¹³ Yuni yunge unguma alowa naa teremomunga
lino oi Yu

paimbo, Yunge ungumu paimbo nimbolio

pele konopu alowa tepo Yu paimbo molo,

Yunge ungumu paimbo molo nimolo lemo

yuni nimo mele paimbo wendo oromo mele om-balo,

ungu akuma nimbe moromo mele paimbo.

*Poloni Timotindo nu Goteni kanopa penga
pilimbelo kongono tendeli iyemu molani nimu
ungumu*

¹⁴ Aku unguma imboma waliwalima pilko molangei ningو waliwalima ningو tiwi. Gote pilko molowi ningو yu waliko pilkolio imbomando i teko neni. Eno naa lipe tapondopa, opa karaye tengе ungumuni pilko molonge imboma paimbo ningو enge ningو ipuki tirimele ulu beambo tirimo ungu lupe lupema opa karaye naa teko molangei niwi.

¹⁵ Aku wali Goteni na kanopa penga pilimbelo mele molambo, Yunge kumbekerena pipili naa kolopo molambo ningو yu kanopa penga pilimbelo kongonomo kau enge ningо teko molko, aku ungu paimbomanga puluma wamongo pilko tumbi tiko mane tinio iyemu molowi.

¹⁶ Maina we ungu lupe lupe nimelema, Goteni pilipe keri pimo unguma, naa pilko umbulu tiwi.

Aku unguma pilkolio teremele imboma Gotenga unguma umbulu tiko yu kanopa keri pimo uluma teremele mele altoko aku tekola olandopa teko mololiko punge kani paa komu naa tendeko molowi.

¹⁷ Kano mane tirimele unguma lupe keri teremo mele teremo. Lupe kelo mele tepalie pele kamukumu awili lepa kangi awini nomba kangi pali kamukumu topa kondoromo mele aku mane tirimele unguma anjo anjo pumbe imboma molko kenjengei nimo. Aku ungu mane tirimele iye-manga iye talo Himeneus kinye Filetus talo morombele.

¹⁸ Aku iye taloni ungu paimboma tiye kolko loi Itembele. Eloni ningilindo, lino oi makilipo ola molorumulumunga pele kangi pali makilipo ola naa molomolo nimbele ungumuni imbo marenga ipuki tirimele ulu teko embambo tirimbelemunga enonga paimbo ningo ipuki tirimele ulumu mainye purumo.

¹⁹ Paimbo nalo ulke timu te iye enge nili teni poromo kinye we enge nimbe angimo mele, Gote paimbo ningo enge ningo pimelemunga ungu pulumu enge pepa, pora naa nimo. Aku ulke timu melemunga ola imbi te moromo, akumu i tepa: “Awilimu yunge imboma kanopa imbi tirimo,” nimbe molopa, “Imbo mareni Awilimu yu nanga Gote nimele imbomani ulu kerima pali tiye kolangei,” nimbe moromola.

²⁰ Ulke awili tengah mingi kou goloni telima kinye kou silvani telima kinye lepa, mingi unjoni telima kinye maini telima kinye Itemola. Mareni kongono pengama teko, kongono lupe lupema

teremele.

²¹ Imbo teni ulu kerima tiye kolomo lemo yu Gotenga mingi kau molopa, yunge mingi kake teli paa penga te molopalie, yuni kongono pengama manda tembaindo molombalomunga yunge nokoli iyemuni yu mingi paa pengamu mele kongono pengama manda timbelo.

²² Paimbo, nu iye kokelemu nalo iye wenepo-mani aie konopu ltemele ulu pulu kerima aku tepo paa naa teambo ningi mune mondoko liko umbulu tiko kowa pungolio ulu pengama kau konopu kimbo tiko teko molani. Ulu tumbi nilima kinye, enge ningi pileli uluma kinye, konopu mondoli uluma kinye, imboma kinye takarliko mololi uluma kinye, aku uluma kau paa tepo molambo ningi konopu kimbo tiko molani. Imbo mare molko kondoko paa Awilimunga imboma kau moromele imboma kinye aku teko uluma teko molowi.

²³ Konopu naa peremo iyemani keke lepo toko nendo yando opa karaye teamili nimele iyemanga unguma paa naa pilimbo ningi umbulu tiwi. Ungu kanoma pilko nimele imboma kinye, ungu kanoma ningi tirimele imboma kinye, ungu kanomani irinale teko opa karaye teangei nimbe peremo mele nu pino.

²⁴ Awilimunga kongono tendeli kendemande imbomuni mumindili kolopa ungu karaye teamili nimbelo kinye manda naa tembalo. Yuni i ulu tepili: Yu imboma kondo kolopa lipe tapondopa, unguma tumbi tipe mane timbelo enge peli iyemu molopa, imbomani yu kinye mumindili kolko teko kenjingkinye pundu naa topa tiye kolopa,

²⁵ *yu uluma tepa ungu nimbe tirimo mele kanoko keri pilko* *yu toko mainye mundungei tengenimboma tekokenjirimele mele nimbe para timbeindo taka lipe mane tipili.* Yuni aku tembalokinye Goteni kano imboma tapondopa, konoputopele toko teremele ulu liko manjiko keri pilkotiye kolko ungu tukumemu ipuki tinge.

²⁶ *Aku wali enonga imbo konopu altopa pepalipe manjili pembalo wali oi kuromanga nomi Sataneni yunge imboma molko yunge kongonoma tendangei nimbe moko topa karerimu akuna tiyekolko wendo pungo konopu penga pepili manda molonge.*

3

Mulu mai talo pora nimbei tembalowaimanga imbomani ulu pulu keri awini tengenungumu

¹ Nalo i ungu paa liko manjeni nimbo nimboi: Waima pora nimbei tembalokinye ulu paa umbuni awini wendo ombalo.

² *Aku walimanga imbomani kou mone kinye eno enongano kau konopu mondoko, enonga imbima kapi ningoenone tekowe imboma marake tekotori toko, anupili lapalinga unguma pilko naa liko, ulu pengamanga paa tereno naa ningotengenaa, Gotenga ulu kake telima pilipo teamili naa ningotengenaa,*

³ *imboma kinyekondo naa kolko, imbomani enoteko kenjingekinyetiye naa kolko, ungu umbulkondonindikoenonga kangi nokokonaakondokolio, aiekonopuitemeleuluma tekoi, imbo konopunaapepili konopuni ulukerimakau pilko*

teko, opa pule toko imboma teko beambo tirimele,
ulu pengama kinye opa pule toko,

⁴ enoni enonga angenupili imboma molko kenjengei ninga opa pulemanga kindo tiko, ulu mare tingeindo i ulumu tembo kinye tepo kenjimbonje molo i ulumu tembo kinye imbo te umbuni timbonje ninga naa pilko tumbi tiko we teko, eno enongano konopuni pilkolio lino iye imbi ola moromo imboma ninga pilko enonga kangindo konopu tinge uluma konopu mondoko Goteni nimo mele pilko tingeindo konopu naa mondoko,

⁵ Gotenga uluma kangimuni kau tinge, konopuna tukundo Gotenga engemuni lino lipe naa tapondopili lino linongan manda teremolo ninga aku teko teremele. Aku ulu teko moromele iyema kinye tendekuna kongono teko naa molko enonga unguma naa pilko umbulu tiwi.

⁶⁻⁷ Aku iyemanga mareni ambo mare linonga unguma pilengei kondi tamili ninga pungo mane tingeindo imbomanga ulke marenga taka liko tukundo pungolio, aku ulkemanga moromele ambo mare Gotenga unguma wamongo naa pilko, konopuni pilkolio ulu pulu kerima tepo ambo kerima moromolo ninga pilko, enonga konopu wamba naa peremo kinye ulu lupe lupema tingeindo konopu tiko tono kolko, iyemani pali mane tirimele unguma waliwalima komuni pimele nalo ungu tukumemu kau wamongo naa pilko limele ambo akuma kondi tonge kinye aku amboma enonga ungu kolo tolima pilko linge.

⁸ Oi iye Janes kinye Jambres taloni Mosesinga ungu nimoma kolo toromo, Isip iye nomi kingimu naa pilipili ninga Mosesinga unguma kinye opa

pule moloringili mele teko kenjirimele iye kinye, niomani kape aku teko imboma ungu paimboma naa pilengei ningo eno ungu paimboma kinye opa pule moromele. Eno konopu paa kerima pepili molkolio konopuni kolo toli unguma kau pilko, ungu paimboma mane tinge ulu pulu te naa pepili moromele.

⁹ Nalo ungu paimboma kinye opa pule toromele iyemani tengen ulu imbomani pali kanokolio, aku iyema keke lepo toko tengen mele tumbi tiko kanongemunga eno teko kenjirimele mele enge awili tepa olandopa naa pumbelo. Oi iye Janes kinye Jambres taloni teringili mele enge naa perimu mele aku ulu tembalo.

Poloni Timotindo nu Gotenga ungumu enge ningon ambolowi nimu ungumu

¹⁰ Nalo nu na ulu lupe lupe pengama tero mele pilko morono. Nani imbo ungu mane tiru ulu kinye, tepo moloru uluma kinye, na ulu terumanga pulumu kinye, Kraist paimbo nimbo enge nimbo ipuki tiru ulu kinye, imboma kinye mu-mindili naa kolopo kandiki tepo takalipo moloru uluma kinye, imboma konopu mondoru uluma kinye, imbomani na teko kenjiko mindili tiringi kinye kongonoma tiye naa kolopo enge nimbo teru uluma kinye, nu pino.

¹¹ Na kombu Antiok kinye Aikoniam kinye Listra kinye aku taunomanga andopo Gotenga kongonomu tendepo moloru kinye na teko kenjiko mindili tiko umbuni awini tiringi meru mele nu pino. Aku teko umbuni keri awini tiringi paa mindili noru kanomu. Nalo Awilimuni na lipe tapondorumuna kinye manda moro.

12 Ungu te paimbo peremo akumu i tepa, Kraist Jisasi kinye peya tapu toko moltolio Goteni kanopa penga pimo uluma kau tepo molamili ninggo aku teko molonge imboma pali we imbo-mani teko kenjiko mindili tinge.

13 Nalo teko kenjiko, kolo toko ungu paimboma nimolo ninggo mane tinge iyema olandopa olan-dopa teko kenjiko molko kenjingge. Enoni imboma anjo kolo toko mane tinge kinye Sataneni eno kondi tombalola, aku wali eno enonganu aku ungu koloma ungu paimboma ninggo pilingela.

14 Nalo Timoti nu ungu paimboma pilko likolio akumu paa paimbo ninggo enge ninggo pilerinu unguma Kraistingu imbo pengamani nu aku unguma mane tirangi kani pilkolio aku unguma ungu paimboma ninggo pilko enge ninggo ambolko pilko kondoko molowi.

15 Gotenga bukuna ungu moromomani Kraist Jisasi paimbo ninggo ipuki tirimele imboma Goteni lipe tapondopa mindili nolemala aulkena wendo lipe yu kinye molko kondonge aulkena lipe mon-doromo mele nimbe tirimo unguma nu ungu lu paa kelomu moltolio pulu polko pilerinu kani paimbo ninggo ipuki tirino mele kamukumu wa-mongo pilko kondowi.

16 Gotenga bukuna moromo unguma pali Gotenga Minimuni nimbe tirimuna pilkolio toringi. Aku ungumani imboma lipe tapondoromo mele i tepa, Aku ungumani lino Gotenga imboma molamili mele mane tipe, ulu pulu keri teremoloma naa teamili nimbe mane tipe, ulu pulu kerima tiye kolopo molopo kondomolo mele mane tipe, Goteni teko molaio

nimbe, ulu tumbi nilima nimbe karomo uluma temolo mele mane tirimo.

¹⁷ Gotenga kongono tenderemolo imboma yunge kongonoma tendemolomanga lipe manjilima pepili kongono pengama tumbi tipo tepo kondomolomunga enge nilima lino kinye pepili nimbe lino aku tepa mane tirimo.

4

Poloni Timotindo nu Gotenga unguma imboma paa ningtiwi nimu ungumu

¹ Gote kinye Kraist Jisasi taloni imbo koinjoma kinye kololima kinye enonga kot pilingele iye talo kanoko molangili Kraist Jisasi ombo mona molopa iye nomi king molopa melema nokombalomunga nani nundo i tepo enge nimbo nio.

² Kraistaunguma imboma ningtiwi. Ningotinio kinye imboma ungu pilinge lemo kape molo naa pilinge lemo kape waliwalima unguma ningotiko tiye naa kolko, enonga ulu teremelema tepo kenjirimolo ningotiko pilko konopu topele tangei ningome tiko, ulu pulu keri teremelema naateangei iri toko mane tiko, eno Goteni kanopa penga pimo uluma teko konopu enge pepili molangei ningome tiko. Eno mane tinindo waliwalima kandiki teko takalikopengateko mane tiko.

³ Piliwi! Imboma ungu paimboma naa pimolo ningotumbulu tiko komu pipi tikolio, eno ungu konopu tiko pilinge unguma mane tinge iye awini mako tonge waimu pele wendo ombalo kani ungu paimboma tiye naa kolko mane tiko kondowi.

4 Eno ungu tukumemu umbulu tiko, kolo toko kange temane lupe lupe tongema kau komu tendeko pilko molonge.

5 Nalo nu, waliwalima imbo konopu pepili unguma wamongo moke teko kondoko pilkolio, mindili te nonio molo umbuni te nu kinye wendo omo lemo aku umbunima we meko, imboma ungu tukumemu paa pilko liko konopu topele tangei ningi tilko andoko, Goteni nu nanga kongo iyemu molani nimbe kongono tirimuma pali teko kondowi.

Poloniyu nondopo kolomboi nimu ungumu

6 Na nondopa wendo ombalo ulu pilipolio nu aku teko teani nio. Na, Gote popo toko no wain ondoko munduko yu tiringi mele, kinye nanga mememuni imbomareni na toko kondoko ondonge. Na mai kombumu tiye kolopo pumbo waimu nondopa wendo ombai teremo.

7 Mele pengama liembo nimbo na enge nimbo keri kuru lipo lkiru. Lkiko pangei ningi owe toringina kamukumu pumbo pora tiro. Kraistainga unguma tiye naa kolopo enge nimbo pilipo lkiru.

8 Aku tepo molorumunga kinye, ulu tendekumu kau we peremo. Owena kamukumu oromunga na mele pengamu noipe moromo, aku mele pengamu Awilimu, kot tumbi tipe pimo iyemuni nando nu iye tumbi nilimu nimbelie timbelo. Na kau molola. Yuni imbomanga kot pilipe moke tembalo walimunga na kinye yu ombalo mele paa kanamboa ningi nokoko moromele imboma kinye peya aku mele pengamu timbelo.

Poloni Timotindo ungu kopunge mare nimu ungumu

⁹⁻¹¹ Demasini na tiye kolopa purumu iyemu yu maina uluma olandopa konopu mondopalie ulke kombu Tesalonaikando purumu. Iye Kresens kombu Galesia provins pumbe, Taitus kombu Dalmesia distrik purumu. Luk kau ya na kinye peya morombolo kani nu aulke te paa korokolio na morona welea nondoko owi. Makoni na kongoно manda lipe tapondopa tembalo kani yu opili liko meko peya walio.

¹² Andi ulke kombu Efesus akuna Tikikus puwi nimbo lipo munduru.

¹³ Onio kinye aulkena ongo ulke kombu Troas ongolio, ali wale pakoli kinye buk mare kinye kongimanga kangini teli bukuma kape, Karpusinga ulkena noiru ltemo akuma liko meko owi. Kongimanga kangini teli buk paa penga, kou awili tepa pulima naa komu tindiko paa liko meko owi.

Pol molopa kenjirimu kinye Goteni yu lipe tapondopa engema tirimu ungumu

¹⁴ Aleksander, kou kapani melema tepa wamoromo iyemu, yuni na paa tepa kenjirimu. Yuni na kinye tepa kenjirimumunga Awilimuni yu pundu tombalo.

¹⁵ Yuni linonga ungu nimoloma paa konopu naa mondopa aku unguma kinye opa pule molopa mainye pupili nimu kani nu aku tepa tepa kenjimbelo kani yu kanoko kondoko molowi!

¹⁶ Nanga kotemu pulu polko pileringi wali imbo teni na kot teru mele naa tapondorumu. Palini

na tiye koloringi. Goteni aku iyemani teko kenjiringimunga pundu naa topa tiye kolopili aku tepe konge tero.

¹⁷ Iyema na tiye koloringi nalo Awilimu na kinye tapu topa kotena angilipe na engemu tirimumunga kot kombuna Juda imbo naa molko imbo lupema moloringi imboma na ungu tukumemu nimbo tiru kinye manda pilerengi. Na kotena enge naa tilkanje laionomani na toko nangei nilimala nalo Awilimuni na naa kolambo nimbe lipe tapondorumu.

¹⁸ Yu mindili nopili, tepe kenjimili ninge walmanga pali Awilimuni na lipe tapondopa wendo lipelie nimbei, yu iye nomi kingimu molopa nokromo mulu kombuna na manda ombalo kani oi maina molopa kondopili nimbelo. Waliwalima yu kapi nimbo imbi lipo pala tondolipo kau pamili. I paā.

Pipiamu topa pora timbeindo Poloni kamukumu nimu unguma

¹⁹ Ambo Prisila kinye yunge omenu Akwila talo kinye, Onesiforus yunge imboma kinye, Poloni eno molko kondaio nimu nindiwi.

²⁰ Iye Erastus ulke kombu Korin we moromo. Trofimus kuro torumuna ulke kombu Miletus molopili tiye kolopo oru.

²¹ Kombu ali teremo walima oi wendo naa opili na morona wambo ninga aulke te enge ninga korokolio owi. Yubulus kinye Pudens kinye Linus kinye ambo Klodia kinye linonga angenupilima Kraistingu imbomani pali nu molko kondowi nimele.

22 Awilimu nunge minimu kinye molopili molani. Yuni eno kinye konopu noipe molopili molangei. I peya nio.

UNGU TUKUMEMU
The New Testament in the Imbo Ungu Language of
Papua New Guinea
Nupela Testamen long tokples Imbo Ungu long Niugini
copyright © 1997 The Bible League

Language: Imbo Ungu

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 25 Aug 2024 from source files
dated 31 Aug 2023

8e236e4f-bf7f-5fe1-a0ea-4f115d5cbf7e